

27. Come à mandato aqua im bote a l'armada, e biscoti; e do marani cargi di biscoti, venuti da Trani, li ha expediti subito.

*Dal Zante, di sier Hironimo Contarini, provedador di l'armada, di 12 luio.* Lauda sier Nicolò Marcello, provedador dil Zante, di provision el fa, licet varij siano li animi de li habitanti; e scrive il successo di l'arma' nemicha, era al Figer etc. Lui è li, et sollicita con letere il zeneral, vengi con l'armata. *Item*, l'armata ussi di colfo di Lepanto, è solum velle 160, zoè 19 quare con la nave e galeaza, 25 galie sotil, il resto fuste e palandarie; et li al Zante era la galia Zena, venuta di Candia, la qual feva aqua; e biasma chi l'ha mandata senza conzar; e questo medemo fa la galia Polana.

*Dil ditto, data in galia, ivi, a di 20.* Come a di 15 zonse a quella ixola sier Piero Sanudo, capetanio di le nave di Soria, con 8 nave mal in hordine, e intrò im porto di la Nata, justa i mandati, a di 18; et havia su dite nave provisionati 380, levati di Candia. *Item*, inteso esso, provedador il zeneral star mal, scrisse tuta l'armata ivi venisse, la qual eri zonse, zoè galie 13 grosse, X nave et X galie sotil, computà quella dil zeneral; et il provedador Pixani, con le altre galie, ritornò da Modon; e cussi, essendo manchato il zeneral, se reduseno su la galia Pixana 49 sopracomiti, et voleano essi provedadori far il governo di l'armada a setimana, et ditti sopracomiti non volseno; unde feno do consieri, qualli poseno parte di far uno vice capetanio zeneral, con autorità etc., e uno vice provedador. Have una di no. Li consieri fonno sier Giacomo Venier et sier Marco Orio. Eravi sopracomiti di galie grosse e sotil e di nave, e lo elexeno lui provedador per vice zeneral, e provedador fu fato sier Alvise Salamon, qual lo lauda. Et poi andoe su la galia dil zeneral, e trovò in cassa 6200 ducati, con quelli va a Napoli di Romania, per pagar soldati, in gropi . . . , in ducati 500 l'uno; dice è molti di questi danari im spizilità di esso quondam zeneral. Et cussi dete ducati 500 a sier Bortolo Falier, sopracomito, nepote dil zeneral, di questi; e il resto portò sopra la sua galia. *Item*, quanto a li tre sopracomiti, causa dil perder la galia pagana, hessendo uno da cha' Contarini, à deliberà di soprastar a la sententia, et aspectar hordine di la Signoria nostra. *Item*, in quella note, con tuta l'armata, zoè galie 34, 13 grosse, nave 20, schierazi 3; summa, velle 70 in tutto; et si partirà per andar a Modom, dove è andata l'arma' turescha, la qual parti a di 16 di la Zefalonia, e va tarda. *Item*, lui à fato molte provisiom, et manda Bortho-

lamio Bevilaqua, soramasser dil zeneral, al Zante, ad haver quanti fanti e provisionati pol haver, e darli ducati tre e più per uno al mexe, e li à dà ducati 1000, e à mandà a impir bote di aqua; sollicita se li man li monitioni, danari e biscoto. Conclude, si grande honor non si farà, non si lasserà haver vergogna etc., e vederà di poner 200 barili di polvere in Modom.

*Di sier Hironimo Pixani, provedador di l'armada, de cinque, date in galia, a l'Anti Passu.* Nulla da conto, et cosse vechie.

*Dil ditto provedador, data a di 20, al Zante.* Comme con X galie andò a Modom, fo al Zante, poi a Modon, e confortò quel rezimento, e turchi lo havia comenzà a bombardar. Narra il ritorno suo al Zante; scrive la conditioni di la nostra armata, galie sotil 34, grosse 13, nave 20, schierazi 3. Quella dil turcho, velle 250, zoè galie sotil 60, grosse 4, quare 28, e la nave grossa e la galeaza, et nave do di botte 800, una di 700, il resto di bote 200 in 300, galeote 20 di banchi 18, 20 l'una; summa, velle 250. Nara la electioni dil vice zeneral e dil provedador, et come era ordinato di partirsi quella sera per Modom.

*Di sier Jacomo Venier, capetanio di le galie grosse, data a di 20, in galia, ivi.* Nulla di conclusioni, e si partirà per il Zante, e havia le chiave di la cassa dil zeneral, et che sopra la galia di sier Hironimo Pixani, provedador di l'armada, fo fato il vice zeneral.

Di sier Marco Orio, vice capetanio di le nave armate, date a di 20. Nulla di conclusioni; chome si partirà etc.; nara la election dil vice zeneral, qual ho scripta di sopra.

*Di sier Piero Sanudo, syndico et capetanio di le nave di Soria.* Scrive quello fece dil mexe di april in Cypro, et che 20 nave, era tra le saline e l'isola, li fè comandamento non si partisse; e sier Cosma Pasqualigo, luogo tenente, fo con lui, et cussi elexeno, per il conseio di XII, capetanio di dite nave, et lo elexe lui; et cavalchè a le saline, dove trovò XI nave, sopra le qual montoe. Et venendo una di ditte, patron Marco Antonio Novello, su la qual era sier Bortolo Minio, fo capetanio a Famagosta, e sier Beneto Sanudo, suo cuxim e fradello, stato consolo a Damasco, et hessendo in Canal di Rodi, l'aspetò per consultar insieme. E mandò a chiamar dita nave, e il patron non volse venir, e il Minio rispose voria esser in Histria. Et cussi, di l'horo conserva, ditta nave si parti. E poi, a di . . . zugno, gionseno in Candia, e fato à intender a li consieri, sier Alvise da Mulla e sier Piero Falier, qualli governavano il re-